

Այստեղ ինքը եւս հերոս է: Ինչ որ ճակատամարտի մէջ կարեւոր դեր է խաղացել եւ իր օգնականները իր մասին խօսելիս նոյն եռանդով են լեցում, ինչպէս նա ԴԱնունցիոյի մասին խօսելիս:

Իտալացին միշտ էլ մի բանով խանդավառուած է: Երէկ Գարիբալդին էր, Մացինին, Կաւուրը, Վերդին, նկարչութիւնը, արուեստը, անցեալը, ապագան, պատերազմը, այսօր՝ ԴԱնունցիոն, Մուսոլինին, մեծ Իտալիան:

Իմաստուն խանդավառութեան հոյակապ երկիրն է, որի արուեստը իր հողի հարստութիւնից է բխում:

Գոհճիկ մարդը Իտալիոյ մասին խօսելիս ամերիկացու ակնոցներ է դնում: Նրա ներքին, հոգեկան առաքինութիւնները մնում են օտար, նրա թաքնուած մեղեդին անհարազատ:

Իտալիան գերազանցապէս ժողովուրդ է եւ համաշխարհային, հող է եւ ոչ նիւթ:

Ահա ինչու ե՛լ նաւապետը ե՛լ իր օգնականները ե՛լ նաւաստիները այդքան բնական են եւ ծովին իսկ հարազատ:

Ամէն տեղ նոյնանման են: Ոչ իբրեւ հակադիր տիպ, ինչպէս անգլիացիները, այլ համաշխարհային գիտակցութեան համակրանքով:

Հոռո՞ր օտարական բառը չէր ճանաչում, այլ բարբարոսը. նա պաշտում էր բոլոր երկիրների աստուածներին եւ civis romanus-ը ամենին մատչելի էր: Այսօր էլ Իտալիան լոկ մտայնութիւն է, ուրոյն աշխարհազգացում եւ ոչ սահմանների մէջ փակուած բռնի ուժ, եւ ա՛յդ, չնայած Սավոյիայի Տան բերած եւրոպական բոլոր նախապաշարունակներին, չնայած նախարարների բոլոր ճառերին:

Իտալիան գերազանցապէս հակաեւրոպա է եւ հակաարևմտական: Թո՛ղ ուսները ինչքան ուզում են անքան մեռնող աշխարհների իրենց համադրութեան մէջ՝ Եւրասիայի զաղափարականութիւնը մէջտեղ նետելով. ապագան Իտալարեւելքինն է՝ արեւային մշակոյթների, հականորդիկ, կեդրոնաձիգ համադրութեան:

Այդ զաղափարները անցնում են գլխիս մէջ, մինչ ղիտում եմ յատկանշական մի տեսարան:

Նաւաստիներին մօտեցել է մի հայ մարդ,

պարզուկ եւ խեղճ, եւ ձեռքի շարժումներով, կոտրտուած Փրանսերէնով, մի ինչ որ բան է պատմում եւ հեռուն ցոյց տալիս: Նաւաստիները ամենամեծ ուշադրութեամբ լսում են նրան, նայում են մարդկային, բարի նայուածքով եւ աշխատում են հասկանալ: Հայը տաքանում է, նաւաստիների ուշադրութիւնը աւելի է լարում: Եւ այդպէս երկար ժամանակ:

Վերջ ի վերջոյ, մարդը հեռանում է, եւ նաւաստիներից մէկը, մտահոգ խօսքը ինձ ուղղելով բացականչում է.

— Chi sa chedice... Ո՞վ է իմանում է՞նչ է ասում:

Ձէին հասկանում, բայց համբերատար լըսում էին:

* * *

Նաւը գրեթէ ամբողջովին լեցուած է Հայերով:

Կան վերադարձողներ, կան նոր գնացողներ:

Էն վերը, առաջի կարգում, մի վարդապետ, դնում է շտապ եպիսկոպոսանալու: Պիտի վերադառնայ Պոլիս եւ, ասում են, Պատրիարքի պաշտօնը պիտի վարէ: Բարձրահասակ, շարժուն, կենսուրախ՝ կարծես ոչինչ չի պատահել՝ մօրուքը գոհունակութեամբ շոյող մի վարդապետ է: Նաւ մտնելու օրից չի երեւում, ոչ ոքի հետ չի խօսում: Նրան հարեան է մի երիտասարդ թուրք սպայ, որ ինձ ներկայացրին ինչպէս նոր սպաննուած Ձեմալ փաշայի սպաններից մէկը: Գնում է Կովկաս, եւ նա՛ էլ այլեւս չի երեւում:

Երկրորդ կարգում մեծ մասամբ նախկին մարդիկ են եւ սովետական պաշտօնեաներ: Ամէնքն էլ վաճառականներ: Ոմանք իրենց բախտը փորձեցին Պոլսում՝ օղի ծախելով, բորսայում խաղալով, բայց ինչպէս երեւում է անյաջող: Այժմ գնում են Կովկասը վերաշինելու: Հայաստանի մասին խօսք չեն անում եւ առհասարակ քիչ են խօսում: Նոր հնարաւորութիւնների հոտ են առել ոսկիների շուրջ մութ խաղեր են նախազգում: Հողերի տակ փորուած արժէքներ կան եւ սահմաններից ուրուականներ են անցնում:

Կոմբինացիաներ...

Վարը, չի հասկացւում, շատ խառն ի խուռն է: